

DOMENIE IV «VIE PAL AN»

Antifone di jentrade Sal 105,47

Salvinus, Signôr nestri Diu,
e tirinus dongje di framieç dai popui,
par che al to non sant o podìn dâi laude
e cu la tô laude ricreâsi.

Colete

Signôr nestri Diu,
danus di adorâti cun dut il cûr,
e di volêur ben a ducj i umign cul amôr che al covente.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jer 1,4-5.17-19

Ti ài metût profete pai forescj.

Dal libri dal profete Jeremie

Tai dîs dal re Josie, la peraule dal Signôr mi è stade dite cussì:

«Prime che ti des dongje tal grim di tô mari ti ài cognossût
e prime che tu saltassis fûr dal grim ti ài santificât;
ti ài metût profete pai forescj».

Tu peiti i tiei ombui:

jeve sù e contiur dut ce che ti ordenarai.

No sta vê pôre denant di lôr,

se no ti fasarai trimâ jo denant di lôr.

Ve duncje che jo

ti fâs vuê tant che une citât rinfuarçade,

tant che une colone di fier

e tant che une murae di bronç

cuintri di dute la tiere,

cuintri dai rês di Jude e dai siei sorestants,

cuintri dai siei predis e cuintri de int de tiere.

Lôr a combataran cuintri di te ma no ti vinçaran,

parcè che o soi jo cun te, par salvâti!».

Peraule di Diu.

SALM RESPONSORIÂL dal Salm 70

R. La mê bocje e contarà la tô justizie.

Li di te, Signôr, mi pari,

che no vedi di restâ malapaiât par simpri!

Te tô justizie salvimi e deliberimi,

slungje viers di me la tô orele e judimi. **R.**

Viôt di jessi par me une crete che mi pare,

un ripâr sigûr pe mê salvece.

Parcè che tu sês tu il gno fuartin e la mê crete!

Diu gno, salvimi des mans de int triste. **R.**

Parcè che tu sês tu, Signôr, la mê sperance,

di frut in sù, Signôr, la mê fiducie.

Sore di te mi soi poiât fin dal grim di mê mari;
des vissaris di mê mari tu sês stât il gno jutori. **R.**

Mi fasarai indenant cu lis grandis voris dal Signôr;
Signôr, o ricuardarai dome la tô justizie.
Diu, tu mi âs fat diventâ savi fin di cuant che frut o jeri
e fin in di di vuê o conti lis tôs grandis voris. **R.**

SECONDE LETURE 1 Cor 12,31-13,13

A restin trê robis: la fede, la sperance e l'amôr; ma la plui grande di dutis e je l'amôr.

De prime letare di san Pauli apuestul ai Corints

Fradis, smicjait i dons plui grancj. Jo però us mostri une strade ancjemò plui alte.

Se ancje o feveli lis lenghis dai oms e dai agnui ma no ài l'amôr, o soi un bronç che al sune e un tamburel che al sglinghine.

E se ancje o ài il don de profezie e o cognòs ducj i misteris e o ài dute la sience; e se ancje o ài dute la fede, tant di traspuartâ lis monts, ma no ài l'amôr, no soi nuie.

E se ancje o doi vie dute la mê robe e se ancje o doi il gno cuarp par che al sedi brusât, ma no ài l'amôr, no mi zove nuie.

L'amôr al è splendit, al è bon l'amôr; l'amôr nol è invidiôs, no si vante, no si sglonfe, nol mancje di rispjet, nol cîr il so tornecont, no si inrabie, nol ten cont dal mâl che i àn fat, nol gjolt de injustizie, ma si console te veretât. Al lasse cori dut, al crôt dut, al spere dut, al sopuarte dut.

L'amôr nol varà mai fin; lis profeziis a scomparissaran; il don des lenghis si fermerà; la sience si sfantarà; di fat o cognossin in maniere imperfete e ancje o profetin in maniere imperfete. Ma cuant che e rivarà la perfezion, al sarà abolît dut ce che al è imperfet. Cuant che o jeri frut, o fevelavi di frut, o pensavi di frut, o resonavi di frut. Ma cuant che o soi diventât grant, o ài dismetût ce che o jeri di frut.

Cumò o viodin come tun spieli, dut fumatât; ma in chês volte o viodarìn muse a muse. Cumò o cognòs un pôc, ma in chês volte o cognossarai in maniere perfete, come che o soi cognossût.

Cumò a restin chestis trê robis: la fede, la sperance e l'amôr; ma la plui grande di dutis e je l'amôr. Peraule di Diu.

CJANT AL VANZELI cf. Mt 11,25

R. Aleluia, aleluia.

Benedet tu, Pari, Signôr dal cîl e de tiere,
che tu âs palesât ai sempliçs
i misteris dal ream dai cîi.

R. Aleluia.

VANZELI Lc 4,21-30

Jesù, come Elie e Liseu, nol è mandât dome pai Judeus.

Dal vanzeli seont Luche

In chês volte, Jesù al scomençà a dî: «Vuê cheste scriture si è colmade par vualtris che mi scoltaiis».

Ducj a testemoneavin par lui e a restavin pes peraulis plenis di grazie che al diseve. E si

domandavin: «Ma chel chi no isal il fi di Josef?». Alore lui ur rispuindè: «O soi sigûr che mi tirarês fûr il proverbî: Miedi, curiti prin te. Dut ce che o vin viodût che al è capitât a Cafarnau, fasilu ancje culî, te tô patrie». E al zontà: «Us al dîs in veretât: nissun profete nol cjate bon acet inte sô patrie.

Us dîs ancje: sot il profete Elie a jerin un stragjo di veduis in Israel, cuant che no colà une gotte di ploe par trê agns e sîs mês e une miserie tremende e regnà par dut il paîs; però il profete Elie nol fo mandât a nissune di lôr, dome a une vedue di Zarepte, te regjon di Sidon. E sot dal profete Liseu a jerin in Israel un disordin di levrôs; cun dut a chel, nissun di lôr nol è stât vuarît, dome Naaman, il sirian».

Sintint chestis robis, chei che a jerin te sinagoghe si inrabiarin al ultin fin e, jevâts in pîts, lu pararin fôr de citât e lu menarin su la spice de mont là che e jere sistemade la lôr citât, cun chê di fâlu plombâ jù. Lui però, passant framieç di lôr, si 'nt lè.
Peraule dal Signôr.

Su lis ufiertis

O metìn sui tiei altârs, Signôr,
i regâi de nestre suditance;
acetiju di bon voli
e fasiju diventâ il sacrament de nestre redenzie.
Par Crist nestri Signôr.

Antifone a la comunion Sal 30,17-18

Fâs lusî la tô muse sul to famei,
salvimi pal to boncûr.
Signôr, che no vedi di restâ deludût
cun tant che ti ài clamât.

Daspò de comunion

Rinfuartîts cul sacrament de nestre redenzie, ti preìn, Signôr,
che chest jutori de salvece eterne
nus fasi cressi inte vere fede.
Par Crist nestri Signôr.